

Duas tariffas per il stortin en ustaria ed en stizun

Omadas chombras refusan l'iniziativa dals ustiers

DA CLAUDIA CADRUVI / ANR

■ Il cussegl dals chantuns exprima chapientscha per l'iniziativa da Gastrosuisse. Tuttina recumonda el cun 24 cunter 13 vuschs da refusar l'iniziativa dal pievel «cunter la discriminaziun da la gastronomia». Uss è il pievel en nomina da decider. Tgi che cumpra ses stortin a bun'ura en pasternaria paja 2,5 pertschient taglia sin plivalur sin il pretsch. Il medem vala sch'ins cumpra il stortin en in take-away gist ensemen cun in capucino. Il giast che solva en l'hotel paja perencunter 3,8 pertschient taglia sin ses stortin. E tgi che emposta e mangia il stortin en ustaria rembursa schizunt 8 pertschient.

Gastrosuisse pretenda cun sia iniziativa che las ustarias hajan la medema tariffa da taglia sco take-aways – dano sin la vendita da tubac ed alcohol.

«Tariffas nunsurveaivlas e malgistas»

Las ustarias sajan la pitga dal turissem, ha ditg *Peter Föhn* (pps/SZ) ier en il cussegl dals chantuns. Ellas hajan da sbatter pervi dal ferm franc e na possian betg mitschar dals auts custs en Svizra. Ins na dastgia pia betg anc dischavantaggiar la gastronomia tar la taglia sin plivalur.

«Las tariffas da taglia sajan nunsurveaivlas e malgistas», ha ditg Föhn. Il medem manaschi stoppia quintar cun autras tariffas sch'el vendia in product sur giassa u en ustaria. Sch'ins vesia quant rument ch'ils take-away chaschunian sin piazzas publicas na sajan pli pitschnas ta-



Cussegliera federala Eveline Widmer-Schlumpf durant la debatta en il cussegl dals chantuns.

KEYSTONE

riffas per talas interpresas betg pli giustifigada.

La meglra schliaziun fiss ina tariffa unitara, han plirs cussegliers menziunà. Quella evitass la burocrazia e sminuess custs. «Damai che nus n'avain da preschent betg en vista da pudair introducir proximamain ina tariffa unitara, di jau gea a l'iniziativa», ha ditg *Brigitte Häberli* (pcd/TG).

Era cun iniziativa restassan duas tariffas

Evitar burocrazia na possian ins betg, ha ditg *Martin Schmid* (pld/GR). L'iniziativa prevedia gea er vinavant autras tariffas da taglia per alcohol e tubac. Tgi che ven-

dia pia ina liongia brassada ed ina biera stoppia er cun l'iniziativa quintar cun duas differentas tariffas.

«Jau mangel mes stortin pli gugent en ina ustaria chauda che ora sin via», ha ditg cussegliera federala *Eveline Widmer-Schlumpf*. Per il confort en l'ustaria saja ella lura era pronta da pajar in pau dapli. L'iniziativa chaschunia sperditas da 750 milliuns francs en la cassa federala. Questas sperditas stoppian vegnir cum-pensadas insaco.

Malgrà ch'i ha dà dapli votums a favur da l'iniziativa ha la chombra pitschna recumandà in «na» – sco gia il cussegl naziunal l'onn passà. Il pievel vegn anc quest onn decider a l'urna.